

Hatene ita-nia direitu no responsabilidade sira: relasaun seksuál no konsentimentu



Ita hotu iha direitus no responsabilidade seksuál no hakarak relasaun ida seguru, respeita malu no saudável. Ita hotu iha direitu atu deside wainhira, iha-ne'ebé, iha situasaun saida, no ho sé de'it mak ita hakarak atu halo relasaun seksuál. Se ita-boot hanoin katak ita pruntu ona atu hahú halo relasaun seksuál ida ho ema ruma, importante atu hatene kona-ba lei sira iha Austrália ne'ebé mak regula kona-ba relasaun seksuál no konsentimentu.

SUMÁRIU

- Kualkér atividade seksuál ne'ebé sein konsentimentu ne'e kontra lei.
- Importante katak ema hotu-hotu ne'ebé mak envolvidu fó konsentimentu pozitivu molok halo kualkér atividade seksuál.
- Agressaun seksuál ne'e krime ida grave. Se karik ita-boot rasik sai vítima ka hetan aggressaun seksuál, ita-boot iha direitu atu hetan tulun. Ita-boot bele liga ba polísia iha número 000 ka ko'alia ho konselleiru ida, liga ba 1800 RESPECT iha número 1800 737732.

Saida mak aktu seksuál?

Haktuir ba lei ne'e, 'relasaun seksuál' signifika tipu hotu-hotu husi aktu seksuál no kaer kona isin ho natureza seksuál, inklui rei, masturbasaun no koitu seksuál iha forma orál. Molok ita-boot atu halo aktu seksuál ida, ema hotu ne'ebé envolve tenki fó konsentimentu pozitivu, ne'e signifika katak sira tenki komunika sira-nia konsentimentu ativamente. La suficiente atu dehan katak fó ka iha ona konsentimentu tanba de'it ema ne'e la rekuza ka reziste.

Saida mak konsentimentu?




Atu fó konsentimentu ne'e katak atu konkorda. Konsentimentu seksuál mak bainhira ema ne'ebé iha **kapasidade mental tomak** no iha ona **idade legál ba konsentimentu nian**, ativamente no livremente konkorda atu envolve iha atividade seksuál.

Atu husu kona-ba konsentimentu ne'e bele simplesmente husu de'it, "Karik ita-boot hakarak halo relasaun seksuál?" Ema ida seluk ne'e bele hatán "sin" ka "lae". Ita-boot no ita-nia parseiru tenki konkorda malu atu halo relasaun seksuál — sempre iha tempu hotu — atu bele sai konsensuál, mezmu se ita-boot iha relasionamentu kontínua ho ema ne'e.

Ita-boot no ita-nia parseiru labele fó konsentimentu se bainhira ita-nia kapasidade atu fó konsentimentu sai menus tiha ka afetada. Se ema ruma mak lakon konxiénsia ka lakon sentidu, ka iha difikudalde atu tetu buat loos no sala tanba influénsia husi hemu tua ka konsume droga, sira labele fó konsentimentu. Se ita-nia parseiru obriga ita-boot atu halo relasaun seksuál, ne'e bele hanesan sinál ba relasaun ida ne'ebé la saudável no la seguru. Obriga ema ruma atu halo relasaun seksuál ne'e ilegál no bele rezulta iha pena prizaun. Refere ba fixa informativu [Hatene ita-nia direitu no responsabilidade sira: violénsia doméstika no violénsia iha família](#) hodi buka-hatene liutan kona-ba relasaun saudável, violénsia seksuál no lei.

Ema ruma ne'ebé iha "inkapasidade kognitiva" signifika katak sira iha kondisaun médiku ida inerente hanesan lezaun serebrál ka deménsia ka inkapasidade ne'ebé afeta sira-nia maneira de pensamentu, rasiósiniu no/ka memória. Iha maioria parte husi estadu sira iha Austrália, ema sira mak iha inkapasidade kognitiva mós iha direitu ba relasaun seksuál konsensuál ne'ebé hanesan ho ema sira seluk. Maibé bele sai kompleksu liu ba ema ruma ne'ebé iha inkapasidade kognitiva atu fó konsentimentu, purezemplu, se bainhira susar ba sira atu komunika ka la kompriende sira-nia direitu atu rekuza halo relasaun seksuál. Ita-boot labele halo relasaun seksuál ho ema ruma ne'ebé mak iha inkapasidade kognitiva se bainhira sira labele fó konsentimentu.



Atividade seksuál sein konsentimentu ne'e kontra lei!



Iha Austrália, ne'e infrasaun ida kontra lei bainhira partisipa ka halo atividade seksuál ho ema seluk, maski rei ka kaer de'it isin-lolon, se karik sira seidauk fó ka laiha kapasidade atu fó konsentimentu. Ida-ne'e hanaran agresau seksuál no ne'e krime ida.



Fahe tutan ka partilla ema ida nia imajen isin-molik ka seksuál sein sira-nia konsentimentu ka autorizasaun ne'e mós kontra lei no bele ba kesar iha polísia. Ita-boot bele buka hatene liutan iha [eSafety Commissioner website](http://eSafetyCommissioner.website).




Ita-boot tenki verifika loloos se ita-nia parseiru ne'e tinan liu ona **idade legál ba konsentimentu**. Konforme lei Austrália nian, labarik ida laiha kapasidade ba foti desizaun atu fó konsentimentu. Ne'e signifika katak kualkér atividade seksuál ho ema ruma mak nia tinan seidauk to'o idade ba konsentimentu nian ne'e nu'udar krime.

Saida mak idade legál ba konsentimentu nian?

Bainhira ema adultu ida partisipa ka halo atividade seksuál ho ema ida ne'ebé mak tinan seidak to'o **idade legál atu halo relasaun seksuál konsensuál**, ida-ne'e konsidera hanesan abuzu seksuál ba labarik, ne'ebé nu'udár krime ida. Idade legál ba konsentimentu nian mak idade tinan 16 iha maioria estadu no territóriu sira iha Austrália, no idade tinan 17 iha Tasmania no Austrália du Sul

Ita-boot tenki verifika loloos se ita-nia parseiru nia tinan liu ona **idade legál ba konsentimentu**. Ita-boot nunka bele hatene ema ida nia idade liuhusi haree ka fihir de'it ba sira. Sempre seguru liu atu husu no se karik ita-boot laiha serteza, husu prova ba idade nian.

Idade ba konsentimentu tuir jurisdisaun



Saida mak akontese se ema ruma halo infrasaun hasoru lei hirak ne'e?

Se ema ruma sai kulpadu tanba violasaun ba lei sira kona-ba atividade seksuál no konsentimentu nian, sira bele sai kondenadu ba krime ida. Infrasaun kriminál sira bele rezulta iha sansaun sira hanesan selu multa ka pena prizaun no bele afeta ba ita-boot nia kapasidade atu hela iha Austrália. Ema ruma ne'ebé mak hetan ona kondensasaun ho infrasaun seksuál hasoru labarik ne'e sei kolokadu iha Rejistru ba Infratór Protesaun Labarik.

Agresaun seksuál ne'e hahalok krime ida ne'ebé mak bele kesar ka denunsia ba polisia no submete ba prosesu tuir kódigu kriminál ka penál sira relevante, nia atu akontese iha-ne'ebé de'it – iha okaziaun sosiál, iha uma, ka iha serbisu.



000 Atu hetan tulun ka ko'alia ho ema ruma iha-ne'ebé

Se ita-boot sai ona vítima ka hetan agresaun seksuál no ita hakarak atu halo keixa ruma, ita-boot tenki kesar ida-ne'e lailais kedas ba polisia. Se ita-boot la seguru ka se iha emergjensia ruma, liga ba 000. Ita-boot mós bele hetan apoiu husi servisu apoiu ba agresaun seksuál, hanesan 1800RESPECT iha número 1800 737 732.

Karik ema ruma husi eskema PALM nian bele ajuda hau?

Atu adapta ka ajusta ba moris iha nasaun seluk ne'e bele sai difisil maibé apoiu no rekursu sira disponivel atu ajuda ka tulun ita-boot. Se ita-boot iha perguntas kona-ba adapta ba moris iha Austrália, ita-boot bele husu ba ita-nia empregadór. Se sira la hatene ninia resposta, sira bele dehan ba ita-boot atu ko'alia ho sé, inklui apoiu ba eskema PALM nian sira seluk hanesan:



Ofisiál Ligasaun ba País (CLO) ka adidu traballu nian sira

Ita-boot bele hetan lista CLO atuál sira hotu nia informasaun kontaktu iha website PALM nian (<https://www.palmscheme.gov.au/contact>).









Liña servisu apoiu PALM nian iha (1800 51 51 31), ka email (palm@dewr.gov.au)

Favór anota katak liña servisu apoiu no inbox email nian ne'e monitoriza husi tuku 8:30 dadeer to'o tuku 6:30 kalan AEST - xamada telefónika sira depoisde oras serbisu ida-ne'e tenki ba insidentes krítiku de'it.

Oinsá hau bele hetan informasaun liután ka asisténsia profisionál konfidensiál?



Se ita-boot ka ema ruma ne'ebé ita hatene mak hakarak atu hetan informasaun liután kona-ba relasaun seksuál, konsentimentu, agresaun seksuál no servisu sira ne'ebé bele suporta ita-nia saúde no bein-estár durante hela iha Austrália, entaun ita-boot bele kontakta ba servisu apoiu referál sira mak iha tabela kraik ne'e. Organizasaun hirak ne'e bele tulun ita-boot ka hatudu dalan ne'ebé loloos ba ita-boot atu hetan servisu ida ne'ebé relevante ba ita-nia nesesidades no asesivel ba ita-boot.

SERVISU REFERÁL NO APOIU PRINSIPÁL SIRA IHA AUSTRÁLIA		
SERVISU	SAIDA MAK NIA HALO?	INFORMASAUN KONTAKTU
Servisu emerjénsia	Zero dala tolu (000) mak Austrália ninia númeru prinsipál ba emerjénsia. Ita-boot tenki liga ba 000 se ita presiza ajuda urjente husi polisia, servisu bombeirus ka ambulánsia.	 Telefone: 000 ba Nasaun tomak, 24/7
Servisu polisia ka ambulánsia lokál	Se situasaun ida la'ós urjente, ita-boot tenki buka liga ba númeru husi ita-nia servisu polisia, bombeirus ka ambulánsia lokál .	 Atu hetan ita-nia eskuadra polisia lokál, buka iha 'Find my local police station in [ita-nia área]!'
Health Direct	Se ita-boot hakarak hetan informasaun liután kona-ba relasaun seksuál, konsentimentu, agresaun seksuál (hanesan oinsá mak atu buka no asesu ba servisu saúde, akonsellamentu no asisténsia legál), vizita ba Health Direct. Ita-boot bele uza sira-nia lokalizadór servisu nian hodi buka ajuda ne'ebé mak besikliu ba ita-nia fatin.	 Liga ba: 1800 022 222 ba Nasaun tomak, 24/7  Website: https://www.healthdirect.gov.au/sexual-assault-and-rape
1800RESPECT	Se ita-boot presiza atu ko'alia ho konselleiru profisionál ida kona- ba relasaun seksuál, agresasun seksuál ka violénsia doméstika, organizasaun ida-ne'e oferese servisu liña apoiu konfidensiál gratuitu. Ita-boot bele ba iha sira-nia pájina website hodi buka servisu sira atu ajuda ita- boot no informasaun kona-ba relasaun saudável.	 Telefone: 1800 737 732 ba Nasaun tomak, 24/7  Website: https://www.1800respect.org.au/

SERVISU REFERÁL NO APOIU PRINSIPÁL SIRA IHA AUSTRÁLIA		
SERVISU	SAIDA MAK NIA HALO?	INFORMASAUN KONTAKTU
Reach Out	Se ita-boot hakarak hetan liután informasaun kona-ba atividade seksuál seguru, konsentimentu no buat perigu sira kona-ba fahe ka partilla imajen/foto íntimu, organizaun ida-ne'e iha informasaun, programa apoiu ba pár no instrumentu referál sira atu tulun joven sira.	 Informasaun online no apoiu ba pár Nasaun tomak, 24/7 Web: https://au.reachout.com/relationships
Lei sira idade ba konsentimentu nian iha	Se ita-boot hakarak atu hatene liutan kona-ba lei sira idade ba konsentimentu nian iha Austrália, publikasaun ida-ne'e fornese informasaun no links ba lei sira spesífiku tuir estadu no territóriu	 Publikasaun: Vizita ba website, https://aifs.gov.au/resources/resource-sheets/age-consent-laws-australia#
Komisáriu eSafety	eSafety ajuda ema Australianu sira hodi prevene no trata ho danu ka buat aat ne'ebé kauza husi abuzu online ne'ebé grave ka konteúdu online ne'ebé ilegál no restrita. Ba iha sira-nia website atu hatene oinsá mak atu relata ka denunsia abuzu bazeia ba imajen, hasai konteúdu, kesar ka denúnsia ba polísia, nst.	 Vizita ba website, https://www.esafety.gov.au/young-people/consent-sharing-photos-videos  Fixa informativa: Oinsá mak atu denunsia danu: https://www.esafety.gov.au/report

Maski halo ona buat hotu ho kuidadu iha preparasaun ba materiál ida-ne'e, maibé eskema PALM, ninia funsióriu, voluntáriu ka parseiru sira sei la asume responsabilidade ba erru, omisaun, impresizaun ruma relasiona ho informasaun iha fixa informativa ida-ne'e nia laran ka kualkér perda ka estragu mak hamosu husi ema ruma ne'ebé depende ka laran-metin ba kualkér informasaun ruma iha fixa informativu ida-ne'e. Informasaun ne'ebé kontein iha fixa informativa ida-ne'e prepara atu fornese de'it informasaun jerál. Ne'e la'ós destinadu ba ema atu laran-metin ba ka atu troka fali konsellu legál ka profesionál sira seluk. Eskema PALM ka ninia parseiru sira sei la asume responsabilidade ba kualkér konsekuénsias ne'ebé hatene hela ka la hatene mak rezulta husi konfiánsa ka laran-metin ba informasaun ne'ebé kontein iha fixa informativa ida-ne'e.

